

胡文忠公遺集

胡文忠公遺集卷九

長沙鄭敦謹

編輯

湘鄉曾國荃

分兵應撈疏 六年四月初九日

臣查武漢未復江西待援統籌大勢萬不可置全局於不顧惟前任浙江甯紹台道羅澤南傷亡之後記名道李續賓新領其軍勢難分援江西且整理稍稽時日而分統亦難其人適侍郎臣曾國藩之父曾麟書聞羅澤南傷亡卽遣其次子同知銜曾國華兼程前來幫辦營務並函諭湘營將士勗勉忠義情詞肫

切三軍皆爲感動。沅湘營均係曾國藩同里之人。寶營係其舊部。驍勇敢戰，從征最久。交曾國華統帶士卒，必樂爲之用。臣卽以湘中營五百名歸其專管，而兼統各營。以卽選知縣劉騰鴻之湘勇後營一千名。劉連捷之湘勇副後營五百名。湖南丁憂同知吳坤修之彪營七百名。儘先補用參將普承堯之寶勇中營七百名。把總普承忠之寶勇左營七百名。計共四千一百名。均係久經戰陣，驍果精卒。於四月初四日拔營出咸甯，進城取道江西義甯州兼程前進。查上年羅澤南等應援鄂省之湘勇寶勇共五千人到武

昌後添募湖南老勇數千人此次分半應接兩地均
不甚弱臣又先期派游擊張榮貴馳赴湖南省城另

募精銳二千名隨後續進湖南派援江西之兵已將
抵袁州分路堵剿均屬得力臣所派援軍約期本月

杪可以齊抵江西省城行糧勉力應付三萬餘兩先
儘征兵支放臣一面分兵援應江西仍一面密商督

臣官文署理提臣楊載福共謀恢復武昌之策并分

兵扼要斷賊資糧總期急復堅城以紓聖念

再臣分兵應接江西拔營以後城中賊迭次出城戰
均獲勝臣於初八日又派水師戰艦下駛沙口攻剿

武昌縣黃州府一帶賊船水師已駛往下游相隔較遠容俟各路稟報彙齊再爲詳悉 奏明謹將大概情形先行 奏慰 聖懷

奏陳水陸分扼絕賊資糧攻勦獲勝疏 四月二十九日

十九日

臣自三月初十日攻破中和門外賊壘三座後賊復於長虹橋西倚城之地乘夜冒雨築壘掘濠因商之鹽運使銜記名道李續賓洪山則令蔣益豐李續猷劉騰鴻率勇由東面進攻而以趙克彰何紹彩葉永泰各營分布於賽湖隄接應兼防鷹嘴閣抄襲之賊

李續賓蔣澤澐兩營伏洪山左右以防賓陽門出撲之賊其中路五里墩則以丁銳義唐訓方普承堯率勇由天平架隄上直前而以鳳營列於湖坪應之令張寅恭鄒漢章率勇繞隄南金沙洲夾擊而以李景湖福營應其後十五日黎明時齊力往攻賊抵死抗拒被我軍鎗礮轟斃數十人乘勝追入值大雨如注火繩俱息軍士衣襟盡溼整隊而歸數日後天霽李續賓以右營移三千觔大礮連日於雙鳳山一帶轟擊賊深匿不出二十五日南北兩岸齊攻李續賓率其營兼率蔣澤澐李續燾各營搗雙鳳山下作勢攻

擊礮子飛入城中自辰至午多方誘之賊仍死守相拒此三月十五以後連日力攻誘賊不出之實在情形也二十八日分援江西之兵前隊拔營賊偵知之欲乘此以亂我二十九日賊由保安門出悍賊數百繞鷹嘴閣至潭家灣縱火燒民房李續賓遣游擊劉錫文率中營前後二哨襲之趙克彰率奇宇右營爲後應何紹彩何慶先率仁營副仁營由南湖尾分路繞出以斷賊歸路兼防賽湖隄下伏賊又慮其偏師誘我而以大股出賓陽門衝撲洪山因令蔣益澧李續燾率左營副右營分伏於小龜山南及東嶽廟廢

瑄之後李續賓率石營各路策應我軍方出賊卽退走劉錫文趙克彰追擊之賊突出二三千人排列賽湖隄施放鎗礮我軍用劈山礮直前轟擊賊卻我進我退賊乘如是者四五次而何紹彩何慶先已繞出湖尾於隄半邀截之賊驚潰劉錫文趙克彰乘勢衝殺斃賊約四百餘生擒十五人奪獲賊旂五面刀子三十餘件馬四匹賊之在新壘者見中路各營分列亦不敢出援其由小龜山而出之賊約千餘人已被蔣益澧截殺敗退而賓陽門亦果出賊三四千及見賽湖隄小龜山之賊皆敗遂不敢前李續燾又突起

擊之斃賊數十賊遂皆敗入城四月初一日五更時賊忽出兩大股一由武勝門小龜山腳而來伏於墳坪一由賓陽門出伏於東嶽廟街破屋內而以悍賊二三百潛至營前山腰吶喊我軍寂然不動嚴陣以待天將曙劉錫文率中營前右兩哨突擊之斃賊約五十餘賊奔走遂追至東嶽廟街伏賊盡起我軍力敵之左右兩哨亦繼至蔣益澧又以其左營飛助之刀矛擊刺憂憂有聲正相持閒趙克彰率奇字右營何慶先率副仁營繞其南面橫擊賊不虞我軍之轉自其後而來遂驚潰計斃賊二百餘人奪其擡鳥鎗

各五桿黃旂三面追殺至雙鳳山下賊復列陣溝中
施鎗礮蓋猶冀小龜山之伏賊相援也又不虞李續
燾率副右營及右營前左兩哨先待於洪山之北俟
其伏出邀截之殪其前鋒數賊生擒十餘賊奪獲馬
一匹大旂三面李續賓復督親兵用劈山礮轟斃賊
數十人賊眾遂狂奔入城城上礮子如雨恐多傷士
卒遂收隊初二日天將明有賊六七百由沙湖南汊
而往莫知其意李續賓派右營哨長都司沈俊德率
前左右三哨疾行擊之斃賊三十餘名該逆遂敗竄
谷哨乘勝追逼賊多淹斃湖中奪獲刀矛鳥鎗十七

件黃旂四面生擒賊十二名訊據供稱僞國宗韋逆
憤竊灣百姓前助官軍紮營派伊等往燒民房等語
此三月二十九四月初一二等日勦賊獲勝之實在
情形也我軍米糧軍火悉由石嘴運五里墩再由五
里墩運洪山必出南湖澗處經過而賊每就近橫阻
每日必輪派一營護運迄今數月無懈防四月初五
日賊偵我援應江西之兵均陸續起程定計分股來
撲是日蔣澤溟率中營之正左副左兩哨在湖坪護
運賊突由賽湖隄橫出二千餘人又由長虹橋前隄
上斜出二千餘人冀劫我軍火米糧李續賓於洪山

聖見師傷趙克彰率奇字右營何紹彩率仁營前往
接應臣亦先派各營出隊於隄上而令人湖之礮船
八哨於湖邊轟之相持約三時之久傷斃數十賊賊
不敢過隄而退我軍護運夫到營收隊此初五日賊
以大股劫糧我軍堵截之實在情形也臣迭與督臣
官文署提臣楊岐福商力攻武漢堅城之下徒傷
勇士再四思維惟有水陸扼要斷賊資糧軍火之一
法臣因派千總余雲龍軍功唐飛舞率勇千餘每日
於下游塘角青山窰灣白楊橋一帶雕韜以斷賊之
陸運李續賓營駐洪山其地至高可以眺遠見有大

股賊護運卽添兵飛擊之楊載福亦飭水師參將李成謀守備周清元先以二營五十二船下紫沙口以斷賊之水運四月初八日水師以全隊攻南北兩岸賊船而賊船負固永不啟旋惟以大礮轟拒參將李成謀守備周清元率兩營戰艦下駛直衝而前行至小河口見賊有烏船三號快蟹二號舢船四號樁重船數十號兩營奮力攻入燒燬賊船五號擊斃淹斃約二百餘人周清元營內亦被賊礮擊沈舢板一號陣亡六品軍功哨官宋富源及水勇八名兩營轉舵下駛至青山又遇賊烏船六號快蟹三號樁重船五

十餘號皆有鎗礮賊不虞水師猝至兩營出不意一擁而前盡燒其輜重并燬賊快蟹二號鳥船一號砲籠擊斃約六七百人賊餘六船下竄風順水流我軍追至白澣山不及而反泊五當口時已二更餘矣此四月初八日水師以兩營下駛沙口大獲勝仗之實在情形也嗣是卽紮營於沙口輪分舢板於上游下游及對面南岸嚴密哨探一遇賊船卽行截剿以冀絕其往來十六日三更時分月色如晝及四更而月頭斂隱約間突聞上游信礮連鳴櫓聲由上直下

賊謀周清元列陣以待見賊之拖罟鳥船九號舢

板五號下駛我軍分船爲三突起橫截之擊沈賊舳
板一隻約斃賊二十餘人賊揚帆徑下我軍且擊且
追至陽邏收隊李成謀等仍回駐沙口此四月十六
日水師在沙口夜哨截剿賊匪之實在情形也所有
陸師之把總賀連城鄒友廷文德元水師之哨官宋
富源四弁均係爭先殺賊屢立戰功先後陣亡實堪
憫惻均請從優照千總例議卹伏候 天恩至傷
亡勇丁各名咨再查明姓名另行咨卹現在夏漲已
發廣東籌解洋礮已有二百尊由湖南運解來營一
俟礮到卽當約會南北水陸各師併力大戰以圖恢

復而紆

聖念

上諭胡林翼奏水陸攻剿獲勝情形一摺著胡林翼督飭員弁乘勝分擊剋日攻復省城毋再延緩所有陣亡之把總賀連城鄒友廷文德元水師哨官宋富源均著從優照千總例議卹欽此五月十二日接奉

再臣於上年十一月克復咸甯縣城因行營無員可委查有湖南舉人揀選知縣汪靜淵向隨湘營當差廉幹有聲臣因飭其代辦咸甯縣事團練鄉勇撫輯難民該令汪靜淵率其子汪樹藩樹聲會同士紳分領團眾戰於馬橋五次戰於山壩橋一次先後擊退

偽監軍熊桂生等斬擒賊目陳長菁對遠逸偽典硝
劉安泰偽軍師汪忠交並賊眾多名三月二十二日
江西賊匪涂逆率眾回竄又經汪靜淵擊退斃賊數
十名四月初二日涂逆復糾合義甯武甯大股乘夜
來撲汪靜淵偵知先令其子汪樹藩號召各團援應
而親率其子汪樹聲領眾鏖戰賊愈聚愈眾汪樹聲
奮勇衝鋒身受二十餘傷歿於陣前汪靜淵揮戈直
前手刃數賊衝突不出遂亦陣亡及汪樹藩率各團
馳援賊退竄通城地界適湖南派防岳州道員江忠
濟前已分兵駐防通城初二初三等日偽指揮何逆

大股由江西義甯回竄江忠濟力戰兩日猶能踏燬賊壘四座初四日出隊擊賊新集鄉團人多且羈賊從間道先破鄉團營壘後路火光頓起該道前敵血戰終日力竭捐軀所部將弁同時殉難除江忠濟各營員弁官紳臣營未得稟報無由詳悉應由湖南巡撫查明請卹外所有代辦咸甯縣事揀選知縣汪靜淵防剿四月屢立戰功且係權理縣事之員殺賊衝鋒父子同時殉難志節不虧尤堪嘉尚又查上年九月十月代辦通城縣事通城縣教諭選補漢陽府教授熊繡蒲圻縣教諭黎鴻漸蒲圻縣候選訓導賀壽

椿候選從九品但懋城王道平均各率團勇先後殺賊遇害忠義可風可否將汪靜淵熊繡賀壽椿黎鴻漸但懋城王道平照例從優賜卹汪樹聲係軍功六品亦請照把總例優卹以慰忠魂伏候

聖恩再

查應援江西之軍自四月初四日拔營前進中途阻兩十日未能速行自道員江忠濟失利以後

臣與督

臣官文南撫

臣

駱秉章先後檄飭順道勦辦查通城

爲入江省必由之路此次大股回竄若不痛加勦除則湖南之南路湖北之北路均屬可虞卽援軍後路亦必牽綴不前軍火餉糈難於接濟容俟該員等沿

途迎勦稟報到時再行 奏明理合附片具 奏

謹按片內請卹各員於五月十二日接奉

旨準

上諭胡林翼奏水陸勦賊連獲勝仗一摺覽所奏情形自
三月十五至四月十六日已踰一月不過零星勝仗於
克復城池毫無把握該署撫於三月初間迭次奏報均
稱旬日之間城池可復又稱春漲初起賊船可以盡燒
今已遷延數月始稱水陸扼截斷賊資糧直似從前並
未籌及且所稱紮營洪山等處斷賊陸運紮營沙口斷
賊水運而四月十六日賊船下駛仍復窮追不及是其

布置實未周而徒以空言搪塞直似計無可施三月二十四日四月十六十八等日寄諭諒該署撫均已先後接到若仍前玩泄殊負委任官文共事一方亦不聞其互相匡救著卽嚴督水陸各營合力進攻務將武漢城池剋期攻克若再事遷延朕必治其老師糜餉之罪至江忠濟陣亡岳州一帶何人扼守本日已諭知駱秉章妥爲布置該督撫亦當預籌策應不可專恃赴援江西之軍以爲必能掃蕩賊蹤也將此由六百里各諭令知之五月十二日同督部奉軍機字寄

水師火攻漢陽江岸賊船及援軍迎勦均獲大

勝疏五月初一日

竊

臣

攻堅未下壯士多傷而鹽運司銜安慶府知府

李續賓日請力攻奮勇之氣會不少懈

臣

自四月十

五日以後卽戒約暫爲休養計惟有水陸扼要斷賊

資糧軍火較爲得力四月初八日

臣

會商楊載福飭

參將李成謀守備周清元先以二營五十二船下紮

沙口其連日截擊獲勝情形

臣

已於四月二十九日

馳奏在案惟兩營分駐下游力尙單薄

臣

等再四

公商必將賊匪上游之船節節掃蕩乃得以分兵下

勦查逆賊戰船分布武漢者其漢陽東門南門至南

岸嘴一帶約停泊二百餘號其武昌城外鮎魚套壇角等處亦各有十號永不啟旋每船密排礮位捍拒死守船外各以大鐵鍊繫大木簾依附之冀以梗塞我船不得相近我軍冒礮衝煙無戰不傷士卒二月以來臣與楊載福密籌火船之策於荊州湘潭兩處採辦千石大船五十餘號實以硝磺蘆葦積高二丈四月中旬夏漲頓長丈餘賊匪所設江外水寨木椿盡行淹沒臣等火攻之具既已逐一周備每火船用勇士二十人駕之附一舢板逼近賊船拋錨下旋始行然纔舉火卽各躍入舢板之中有未近賊船而先

舉火者斬之又預製攔箒淫絮各數百具分豎於船以避賊礮專待東南風起以期一炬焚之四月二十五日楊載福添派游擊鮑超之營下勦適李成謀周清元追擊賊船溯流而上奪獲賊拖罟一隻夷礮四尊銅礮八尊硝礮千餘觔錢千餘串米五十石并燒燬賊小船數十餘隻擊斃淹斃之賊無算其棄船登岸之賊悉爲北岸都統都興阿馬隊所殲無一脫者是日上下游水師夾擊賊匪力戰最久我兵傷亡僅十五名四月二十七日南風漸起楊載福親率水師各營之奮勇者周視賊船形勢試驗水勢淺深指示

下手之處二十八日南風大起令參將張啟基都司
孫昌凱喻吉三萬化林四營之畱守上游者出隊作
接應之兵楊載福卽於寅刻親督游擊王明山都司
陳金鼇李濟清三營並派畱防之四營率其火船五
十餘號順風揚帆蔽空而下直抵漢陽東門南門上
下圍裹我軍勇士斫斷木簰鐵鍊逼近賊船賊見我
船猝至倉皇無措開礮抗拒僅中於蘆葦深處及積
薪淫絮之中而火船緊逼霎時火起光燄燭天槍礮
齊發所有漢陽一帶賊之烏船拖罟快蟹長龍約二
百餘號糧食軍火不及百號燒燬淨盡僅逃去小舢

板三隻小扒船四隻燒斃溺斃之賊無算並延燒漢陽江岸陸賊營壘火光中更有數十賊被火葯衝入空際而復墮於江岸者臣是日預派李續賓等東路中路及石嘴沌口各營四面分攻保安門望山門青山壇角窰灣等處并以大隊五千人循江岸以護水師午刻火微而賊船亦盡我軍始收隊是日水師計陣亡哨弁一名勇丁十餘人受傷之弁丁四十餘人此四月二十八日水師火攻漢陽賊艦盡數焚燬之實在情形也臣分四千一百人交同知銜曾國華統之以援江西由咸蒲進發四月十一日曾國華等已

至崇陽聞江西義甯州城匪回竄湖南防兵在通城
失利道員江忠濟陣亡僞指揮何逆將復竄蒲圻以
阻江西援軍之路會國華遂率各軍開道馳至蒲圻
二十日亥刻何逆果至賊眾約五六千人而不虞我
援軍之猝遇也二十一日二十二連戰兩日大勝殲斃
騎馬黃衣賊目二名轟沈賊船一隻淹斃擊斃之賊
無算奪獲遺棄賊糧及軍械無算我軍陣亡四人受
重傷者四人臣已函飭會國華迅速追勦崇通直達
義甯此四月二十一二等日江西援軍中途遇賊迎
勦獲勝之實在情形也現在水路之賊僅餘武昌城

下鮎魚套賊船二十隻以四營水師扼之賊可待斃
楊載福已駛往沙口探報黃州府一帶新從湖口小
池口調到賊船三百餘號因沙口已駐水師徘徊瞻
望旬日之久不敢上犯是賊之畏怯已可概見揚載
福卽日率領六營下駛痛剿可一鼓殲除也此次賊
之大烏船大拖罟長龍快蟹焚燬殆盡水賊之力已
無能爲其漢陽接濟久斷武昌之南路東路中路均
已扼要無路可通惟下游之窰灣青山一綫江隄尙
有小路可通臣與李續賓派兵一千餘名上下梭巡
以雕剿之法日夜游擊賊勢實已窮蹙臣官文所派

弁兵搜獲賊匪偽報文書據稱各路援賊期以前後

夾擊

臣

營及李續賓洪山之營而大治武昌各官紳

探報亦同前情

臣

等密商即使四路齊撲亦可努力

決戰不致別有貽誤所有水師火攻得手援軍中途

迎剿各獲大勝及水陸斷賊接濟情形謹會同督

官文署提

臣

楊載福恭摺由驛馳

奏

上諭胡林翼奏水師火攻漢陽賊船並援軍剿賊均獲大

勝一摺

著官文胡林翼等迅即乘此聲威激勵將弁

尅期收復武漢二城毋再遲延欽此五月十四日火票

遞到

援軍遇賊羊樓洞水師沿江追剿陸師前後剿

禦均獲大勝疏 五月十五日

五月初一日臣將水師火攻漢陽江岸賊船援軍中
途迎剿獲勝及水陸斷賊接濟情形具 奏在案查
江西義甯賊匪由通城回竄冀圖阻遏援軍同知銜
曾國華迎剿獲勝四月二十八日抵羊樓洞偵知前
途賊眾尙萬餘人二十九日知縣劉騰鴻率湘後營
之前左兩哨由中路進參將普承堯率寶左營繼之
劉連捷率副後營由山石進湘後營之右後兩哨繼
之吳坤修率彪營普承忠率寶中營由山左進曾國

華率湘中營居於後劉騰鴻等甫出羊樓街卽遇大股賊至奮擊之斬獲無算賊大敗退去追之數里賊整隊復戰又敗之如是者五六次劉騰鴻奮不顧身所向披靡追及分水坳已十餘里矣普承忠恐其深入力疲策馬繼進轉在劉騰鴻之前手持長劍遇賊卽斫勇銳百倍其伏賊之由左右兩山而來者經吳坤修普承忠劉連捷各軍於樹林叢雜中鎗斃牙斃無數追至黃土堡已二十餘里其地稍平我軍乃三路會合賊以我軍遠追欲久戰以困我甫收隊賊復回撲普承忠商令各營鎗礮并集一處親督逼賊連

環轟之賊旂盡靡鼠竄而去吳坤修親率彪營殿後
整隊以歸是日計殺賊五六百名擒斬偽水總制張
逆偽金總制毛逆偽將軍陳逆李逆生擒師帥旅帥
及偽典糧三十餘名奪獲黃馬褂五件紅花帽二頂
偽印六顆刀矛三百餘件擡鎗鳥鎗五十餘件我軍
惟湘後營受傷五名三十日辰刻賊大股復至羊樓
街分三路而進中路陣於街外土坪右路出伏嶺左
路出荆子山每路又各分五六支漫山徧野勢頗兇
悍曾國華令副後營斷伏嶺之口分彪營之半斷左
白阪之口而以湘中營彪營敵中路後營敵右路竄

營敵左路正對陣開後營偶從旁面開放劈山礮中營士卒遂大呼直前賊以連環鎗迎拒我軍冒煙逼賊陣斬衝鋒悍賊數十人彪營繼之賊中路大敗左右兩路皆潰我軍三路窮追時分時合但見賊之所在各營均恥後至路旁田畔斃賊極多賊委棄衣服銀錢於地冀軍士拾取緩追而我軍直前不顧追及羊樓上洞石橋路惟一綫兩壁懸崖賊奪路爭逃洞口壅塞軍士乘勢掩殺應手而斃積尸滿途至有兩人而手刃二十七賊者午刻始收隊計斃賊八百餘名生擒五十三名釋放脅從二十一名奪獲旂幟刀

牙五百餘件而鄉民之隨後拾取賊械繳呈者復以千數我軍僅受傷七名訊據賊供四月初旬何蓮從義甯回竄襲破江忠濟防兵卽議奪舟偷度大江以擾新隄沙市賊眾萬餘不料突遇援軍四戰均敗等語我軍遂乘勝直搗崇陽賊眾逃散過半所餘不過數千人聞官軍將至先期遁入通城地界此四月二十九三十兩日援軍在羊樓洞遇賊大勝之實在情形也署提臣楊載福自四月二十八日火攻得手下紮沙口爲老營二十九日四更自沙口開船三十日辰刻至鷺公涇探詢團風以下盡皆賊船楊載福令

水師六營分爲兩路李成謀李濟清周清元三營由新河下勦而自率鮑超王明山陳金鼇三營由老河下勦值賊船揚帆上駛我軍兩路夾攻開礮轟擊且焚且退直至黃州府城燬沈賊船百餘號斃賊無數其裝運火礮之船煙燄騰空一併燒盡而黃州對岸樊口賊船數十泊於港內以拖岸快蟹橫截於外我軍合六營環攻不能得手楊載福因督五營在港外對賊轟擊而令鮑超一營乘閒衝入港內夾燒賊船登時火起哨官陳德懋陶忠太王玉興奪獲賊長龍一隻礮五尊又舢板一隻惟兩岸之賊礮子如雨又

於西山高處以噴筒火箭極力抗拒楊載福恐鮑超
深入飭令退出港外而賊輜重船亦下竄出港我軍
六營併力回擊賊船順風乘流遂已下駛王明山周
清元兩營追之楊載福仍率四營力撲港口三次衝
入我軍傷亡頗多是夜卽駐得勝洲五月初一日出
隊攻樊口岸賊已築土城非得陸師協勦不能破壘
賊船約尙存十餘號依壘而守聞巴河以下賊船尤
多王明山周清元已先一日追賊於下游楊載福遂
令鮑超李濟清二營回駐沙口力扼樊口之水賊無
使上竄而率李成謀陳金鼇下駛是日未刻與王明

山周清元會於黃州下三十里之巴河乃知三十日
樊口竄出之賊船均經王明山周清元卽時追燒淨
盡矣楊載福念水師自四月二十八日因東南風力
焚燒漢陽賊船已盡惟餘武昌鮎魚套內之船不過
二十隻我軍駐沌口者四營賊必不能上犯駐沙口
者二營賊之往來皆斷其下游蘭溪黃石港蘄州田
家鎮興國之富池口廣濟之武穴龍坪江西德化之
羅家嘴再下而小池口而九江府等處賊船運軍火
絡繹上竄及此風利不泊乘其不備可盡付一炬也
卽日率四營山蘭溪進發至黃石港火蛋火箭一擲

俱然且擊且燒更無窒礙未及二時賊船五六十號
蕩然無存日暮收隊卽泊江渚淺處初二日寅刻出
隊辰刻至蘄州城下泊賊船數十城上黃旂數面我
軍突擊之賊卽遁去賊船遂焚燬一空隨入城搜捕
餘匪開舟下剗巳刻至富池口燒賊船三十餘隻午
刻至武穴賊船擁載輜重紛紛下竄僅以礮船十餘
隻迎拒楊載福知賊之不敢久戰也急派李成謀一
營飛檣而下以抄其尾陳金鼈一營迎頭奮擊而密
令王明山周清元二營率勇登岸伏蘆葦中賊果棄
船岸竄王明山周清元突起擊之無一脫者並將其

棚卡燒盡陳金鼇營內奪獲大拖罟一隻舢板二隻
李成謀營內奪獲快蟹一隻拖罟一隻舢板一隻大
小礮位三十餘尊糧餉軍火無算餘船均燒盡是夜
遂泊武穴初更時居民稟稱賊船昨日下午竄百餘隻
內惟礮船數隻聞泊九江上三十里之羅家背今日
下竄之船係守武穴之僞尙書莫逆也初三日辰刻
至龍坪賊以舢板拒戰全力擊之焚燬立盡巳刻至
德化縣之羅家背賊船已竄去大半惟港內匿船三
十餘隻焚之又盡午刻至九江寂無一船小池口築
有土壘亦無船礮惟城上徧豎黃旂開礮抵禦而礮

子不能遠及楊載福令各船對準城中轟擊二時之
久賊無出城者楊載福因言前歲水陸各軍併力東
下前湖南提臣塔齊布以頓兵九江城外積憤愁思
未竟其功我軍今復至此士卒聞言亦皆感念前事
聲淚俱下羣請登岸攻城以紓積憤惟念孤軍深入
卽得城而無重兵與守禁約再四乃於初四日回舟
初九日仍抵沙口老營弁勇之受傷者不過數人其
自四月三十日由沙口出隊焚擊賊船約數百餘號
擊斃淹斃之賊無算奪獲賊拖罟快蟹長龍舢板其
八號礮四十尊鎗刀旂幟黃傘各數百件糧餉軍火

則悉奪之於賊以資軍用十日之內一往一來已轉戰千里矣此四月三十日至五月初九日水師下勦直抵九江仍返沙口大獲勝仗江面肅清賊船斷絕之實在情形也

臣

前派勇在下游窰灣青山日夜雕

勦並於白陽橋設卡巡防陸賊接濟近亦斷盡五月初六日賊忽自武勝漢陽兩門出四千餘人一赴塘角一集小龜山於賓陽門出三千餘人踞雙鳳山忠孝門出二千餘人田隴鷹背閣出三千餘人踞賽湖隄其八步街長虹橋則又各出二三千人陽爲直撲

臣

營及李續賓洪山之勢而實欲撲我白陽橋卡以

通賊援也及見我軍各出賊又趨起不前因派蔣益
禮率左營迎擊小龜山伏於山右分一哨以誘之賊
見兵少追至山腳伏勇突起擊賊大驚潰忠孝門之
賊因疾走來援適守備李續燾率副右營守備李登
闢率右營均出小龜山左邀而擊之此股遂大潰其
雙鳳山之賊同時並進將至東嶽廟生員蔣澤漢守
備蕭孚泗率中營出洪山之前參將朱品隆率前營
出洪山之左由廟後抄之其賽湖隄之賊以都司趙
克彰率奇字右營何紹坤率仁營擊之我軍各路齊
登塵戰移時趙克彰復以劈山礮連環轟之何慶先

率副仁營自南湖突出橫擊賊不能支遂先後敗潰而賊之敗於襄湖隄者見雙鳳山賊勢尤急復循城脚赴救而已無及矣中營前營右營直追過雙鳳山前逆賊踰溝爭門自相踐踏積尸盈溝其不得入城者約三百名悉爲我勇所殺蔣益澧追逐小龜山敗賊至紫金山殺賊約二三百人被逼落水者無數白陽橋撲卡之賊軍功唐飛舞率虎勇千總余雲龍率武勇奮力抵禦正相持閒李續賓已先派守備秦冠鏌率博白勇蕭廷黼率江勇從窰灣斜出賊畏其抄截相驚退走博白勇江勇直前橫擊斃賊五六十人

於是武勇虎勇自西首江邊博白勇江勇自東首湖邊互追之逼至塘角賊卞李續賓遙見江岸賊勢尙盛飛調副右營右營各增四成隊飭把總蕭廷玉馳往東興洲迎截斃其前鋒數人賊遂紛紛上竄入城其入步街長虹橋之賊本未遠出及見各路賊勢均敗卽先遁入矣我軍申刻收隊計斃賊六七百名生擒二十四名奪獲騾馬四匹旂幟刀矛小鎗百餘件訊據生擒之賊供稱賊目洪逆韋逆遙約九江下游援賊萬餘於五月初六日前後夾撲我營舉火爲號不料水師下駛焚燒賊船本日未見舉火意陸賊愆

期等語李續賓欲因以紿賊初九日派蔣益澧等多
張旂幟廣備草薪至洪山後十里之最高處舉火搖
旂作接戰狀城中之賊均登蛇山以企望初十日黎
明仍以前法誘之密飭各營嚴陣以待必俟賊近壘
下舉旂一麾齊力奮擊有先出後出者立斬之賊見
後路火光誤爲援賊辰刻遂洞開各門而出勢甚兇
猛我軍掩旂息鼓寂然不動臣又加派同知唐訓方
率訓營唐協和率副訓營游擊張寅恭率恭營由南
湖坪先後渡湖相機助擊賊漸逼漸近午刻始逼壘
前李續賓舉旂一麾各營齊出李續燾率副右營李

登闕率右營副右副後各哨進洪山之東北麓分其
前哨左哨副前副左四哨進洪山之西北麓唐飛舞
率虎勇蕭廷黼率江勇進洪山北之姚家嶺而出出
隴斜出小龜山尾以繞擊之都司張勝祿率中營出
洪山之前朱品隆率前營出洪山之南趙克彰何紹
坤何慶先皆同時率其勇出鎗礮齊發刀矛並舉各
路逆賊邊遽無措紛紛大潰蔣益澧聞戰捲旂疾趨
合秦冠鑣之博白勇出南湖東汊捷徑斜出以邀截
之中和保安兩門所出之賊潰奔南湖復爲唐訓方
等營截殺轉趨養湖隄隄面不寬奪路而奔自相踐

踏死者以六七百計直追至鷹背閣爲城上礮子所阻乃始收隊中營前營追殺過雙鳳山虎勇江勇右營副右營分追小龜山計其斃賊一千二三百名橫尸遍野而賽湖隄尤多生擒賊四十二名奪獲馬騾十三匹旂幟刀矛擡鎗鳥鎗三百餘件十一日蔣益澧仍施前計於後路舉火賊猶不悟復分路來撲我軍甫出賊又卽奔潰奪獲馬八匹鎗礮旂幟無算而沌口沙口各水師亦每日奮攻至塘角鮎魚套牽綴之此五月初六日賊匪撲十初十一等日計誘賊出陸師連獲大勝之實在情形也此次水師蹕行殊

遠直搗九江城下因下游並無陸兵不能久駐十日之中往返千里勞績最著援江西之四千一百人其啟行之日卽江忠濟全軍覆沒之日賊礮方張不期相遇四戰皆捷兵力甚強可期得力後路援賊計在夾擊臣等尙可分兵迎勦惟訊據生擒賊供四年八月武漢竄出賊日首逆楊秀清皆分裂以徇此次賊目分守武漢畏不敢奔其親眷均繫於金陵揣量賊情必須盡殺乃止卽十分窮蹙已極彼尙日夜待援賊之來也所有水陸出力弁員應俟武漢克復彙案奏請從優獎勵其中礮陣亡之守備李登進可否

照都司優卹千總熊有章向三元可否照守備優卹
把總左玉佩鄧友廷羅祖績可否照千總優卹外委
雷光友何添元六品軍功趙國樑藍翎六品軍功陳
玉升可否照把總優卹以慰忠魂出自 天恩其
餘陣亡弁勇容再查明分別請卹

謹按疏內請卹各員於五月二十八日接奉

旨準

胡文忠公遺集卷九終

胡文忠公遺集卷十

長沙鄭敦謹

湘鄉曾國荃

編輯

遵奉

諭旨 瀝陳下情疏 六年五月十五日

於五月十二日接準軍機大臣字寄五月初六日
奉 上諭胡林翼奏水陸勦賊連獲勝仗一招覽
所奏情形自二月十五至四月十六日已踰一月不
過零星勝仗於克復城池毫無把握該署撫於三月
初開疊次奏報均稱旬日之間城池可復又稱春漲
初起賊船可以盡燒今已遷延數月始稱水陸扼截

斷賊資糧直似從前並未籌及且所稱紮營洪山等處斷賊陸運紮營沙口斷賊水運而四月十六日賊船下駛仍復窮追不及是其布置實未周而徒以空言搪塞直似無計可施三月二十四日四月十六十八等日寄諭諒該署撫均已先後接到若仍前玩泄殊負委任官文共事一方亦不聞其互相匡救著卽嚴督水陸各營合力進攻務將武漢城池尅期攻克若再事遷延朕心治其老師糜餉之罪至江忠濟陣亡岳州一帶何人扼守本日已諭知駱秉章妥籌布置該督撫亦當預籌策應不可專恃赴援江西之軍

以爲必能掃蕩賊蹤也將此由六百里各諭令知之

欽此

聖訓嚴明燭照千里跪聆之下感悚難言

臣

治軍無狀頓兵城下五月有餘竊念

臣之職分不

僅兵事不可上厯

聖慮卽軍糈餉項亦豈可久

煩度支乃以收復稽遲上貽

宵旰之憂實屬罪

無可道

臣

自上年臘月至今年三月逐日督隊往攻

驅血肉之軀與礮石爲敵傷亡水陸勇丁三千餘人
尙不敢因此稍有懼惟道員羅澤南及都守千把
百餘人節次陣亡皆係四方精銳之士羅澤南篤信
學道尤深惋惜現在陸營良將以李續賓爲尤著該

貞廉正樸誠凡戰事之難而他入所怯者無不毅然
自任攻撲省城所乘馬迭次中礮倒地幸賴

天

威良將無損兵易募而將難求求勇敢之將易而求
廉正之將難蓋勇敢倡先是將帥之本分而廉潔正
直則糧餉不欺賞罰不濫乃可固結士心歷久長勝
也臣於四月以前執意不悔欲以力取旁觀皆笑臣
愚即臣自問計亦良左四月以後乃禁約仰攻分精
銳四千餘人由咸蒲以取義甯不期順道與賊相值
四戰皆捷分水師以清下游江面直達九江水師火
攻之策自正月購辦三月已齊積薪油而實以火蒺

三次遇雨遲至四月二十八日乘風縱火漢陽之賊舟盡付一炬是日東南風利得其一面不能不遺其一面尙餘武昌鮎魚套內賊船約二十隻若再襲前策賊已知而防我卽當另行籌畫臣自領五千人可扼南路之三面李續賓領六千三百人扼洪山之東路又分勦青山審灣之北路水師六營下駐沙口是水陸之賊直至近日乃援絕路窮臣之智計遲鈍未能先事審機慚憤無地漢陽之賊糧久斷四月以前尙取給於武昌近月以來武漢均斷北路兵勇已經督臣多方激勵整飭惟馬隊將士忠勇可恃陷陣衝

鋒功推第一馬隊爲國家之正兵所當愛惜而善用之若迫使乘墉是舍所長而用所短矣臣與馬隊並未晤見刻下南北兩岸尙難彼此調撥日後武漢收復卽當會同商議以步隊之堅定不搖者分隸馬隊而以步隊戰於前陣俟賊眾敗潰卽以馬隊乘勢掩殺蓋步兵追賊每以十餘里而輒止多亦不過二十餘里而力已竭若得馬隊乘機追勦賊可盡殺也下游九江府興國州陸賊萬餘以僞檢點古隆賢等分道來援冀約城賊夾擊大營臣卽預撥三千餘人探實距營百里以內及其未定而迎勦之十二月十

三日乘勝窮追已過百里以外尙未詳稟應俟另案
奏報至道員江忠濟全軍覆於通城所部楚勇素
稱善戰近年積習太深兵已弱而將不知突遇劇賊
遂至於敗湖南已改派防兵二千餘人駐守岳州而
援軍已過崇陽敗賊鼠逃解散過半計日可抵江西
義甯州城迭次委解軍餉軍火趕緊接濟可慰

聖懷

臣

愿觀前史李左車之告韓信尙以頓兵城下

情見勢絀爲戒是職易攻難自昔已然臣之才力何
足言兵惟才有限而志無窮誓與兵事相終始期於
殲滅此賊而已萬一變生他路禍出意外臣亦不敢

退怯苟且自取羞辱內察軍情外度賊勢臣之過慮
當不至此所有感悚下忱理合附驛陳奏伏祈

皇上聖鑒訓示

硃批覽奏已悉以前戰功具載摺中無須表白朕惟責以
實效歷述艱辛於事何益汝督軍進剿固不可稍存畏
怯然國體具在亦應寓慎重於其中欽此五月二十八

日奉

分兵迎剿援賊並攻剿省城迭次大勝疏

六月

十二日

竊臣自五月初十一等日計誘省城賊出賊已大

創其援賊之期襲後路者探實距臣營約七十里在
豹子澗等處築壘掘濠及其未定而迎剿之可期得
手因於五里墩淇山城外各營抽調三千餘人五月
十二日三更起行辰刻抵茶棚地方適與賊遇我軍
一面擇險安營一面審察進剿之路就茶棚形勢分
東西中三路進兵賊亦分三路蜂擁而來每路約賊
二千人其東路之官山高嶺另有股匪三四千人意
欲繞我東路之後兼以接應各路之賊賊聲甚囂我
軍寂然若不聞者各營官會商合派以同知唐訓方
率訓營同知蔣益澧率左營擊中路而以左營後哨

及訓導周瑞副前營爲接應以都司李績燾率副右
營擊東路及官山高嶺之賊李績燾以東路賊多行
陣不整先破其多者則他路之賊氣皆奪匹馬衝鎗
奮登山巔眾勇隨之殪其前鋒悍賊數十名賊眾駭
愕乘勢掩殺遂敗東路之賊訓營湘左營力攻中路
槍礮之後繼以刀矛中路之賊亦敗而歸於西路矣
唐協和率副訓營鄒漢章率副左營及親兵哨官胡
達萼康迪紅等力禦西路之賊酣戰最久賊殊死鬪
我軍十盪十決勇氣百倍訓營湘左營復從旁抄之
而西路之賊亦遂大敗後隊之余雲龍陶茂林率武

勇繼至追奔二十里至二虎井時已成刻收隊回營計共殺賊五百八十餘名生擒二十餘人奪獲大小黃旗一百五十餘面擡槍烏槍一百二十餘桿大礮三尊火礮鉛丸二千餘觔刀矛五百餘件訊據生擒各賊供稱逆賊韋俊急調僞檢點古隆賢等自九江上竄糾集興國大冶之賊沿途裹脅計共萬餘暗約城賊夾擊洪山五里墩各營因被水師下勦繞道愆期不意又爲官兵所敗等語十三日寅刻偵賊將遁拔營追至八角嶺賊復遁豹子澗又追敗之遙見賊數千人從梁子湖濱縱火燒民屋以數千賊伏於麥

門橋房屋及林木深處湖邊泊賊划數十隻我軍據險利待蔣益澧率勇數十人前出誘之兼審地勢卽會商唐訓方結陣驛路之左以勦湖濱之賊蔣益澧由驛路渡麥門橋搜其伏賊余雲龍陶茂林率武勇隨之而以副前營副左營爲後應李續燾率副右營赴湖濱火攻賊舟布置已定蔣益澧遂渡麥門橋先以火箭噴筒延燒林木及村外積薪伏賊冒火衝出我軍以劈山礮擊斃黃旂悍賊數名賊遂敗潰而湖濱之賊悉聚來救副右營副訓營齊出擊之斃賊十餘名水賊飛槳來救副右營火器突起焚賊舟六隻水

陸之賊均潰我軍會合尾追三十餘里至於新店賊忽反旂我軍各營奮擊立斃先鋒賊目數十名又敗走之於是長驅直前沿途勦殺申刻行抵葛店賊之奔竄益急爭先奪路自相踐踏死傷甚多計共斃賊數百名奪獲刀矛旂幟二百餘件兩日追奔百里賊蹤已遠始令均回大營此五月十二十三兩日迎勦援賊均獲大勝之實在情形也臣於附省要隘均掘長濠防其竄逸二十二日黎明賊以大股七八千出城自東嶽廟橫列至楊家灣冀以平毀我濠又由鷹嘴閣出賊二三千分踞於南湖坪又出賊三四千踞

小龜山並伏千餘於小龜山後之雷家山以冀抄襲我軍李績賓密爲布置俟賊逼近號旂一舉各營齊出湘中營衝東嶽廟之賊短兵相接賊猶抵死抗拒中營之後哨石哨并朱品隆之前營因捲旂潛行自街外包賊後而抄襲之賊遂大敗殲斃悍賊五十餘名掩殺於濠中者百餘名鷹嘴閣之賊蜂擁來援何慶先率副仁營趙克彰率奇字右營攔擊賊遂盡集於南湖坪何紹坤以仁營橫衝賊陣臣又添派唐協和率副訓營丁銳義率義營張寅恭率恭營自五里墩循隄後而兜擊之斃賊二百餘名而鷹嘴閣南湖

坪之賊俱敗蔣益澧率左營至小龜山尾分爲兩支
以一支攻山上之賊一支繞出山右橫擊雷山伏賊
李續燾率副右營繞出山前夾擊見賊勢將退急前
攔截逼賊於沙湖之尾與左營兩支相合而唐飛舞
之虎勇又至四面圍殺斃賊二百餘名逼入沙湖淹
斃者無算賊於城隅湖畔預設小船安放礮位飛馳
相救我軍用礮山礮轟之斃船賊七八名賊船亦退
其排列於楊家灣之賊則李登闢率湘右營各哨齊
力擊之賊不能支遂皆敗走我軍乘勝齊追直至城
下始行收隊二十四五等日天尙未明賊仍大出平

毀我濠我軍俟其將至濠邊各營齊出斃其悍賊數十名賊之後隊先潰飛奔入城我軍追擊其不及入城者皆爲我兵所殺二十九日賊於五更以大批出城至雙鳳山築壘並平毀我濠我軍按兵不動已刻以後乘其飢疲突出擊之賊眾披靡將賊壘平毀此五月二十二二十四二十五二十九等日勦擊城賊大獲勝仗之實在情形也五月二十九日獲賊閒謀文書知逆賊古隆賢敗後遁匿武昌縣之樊口並以湖口來援之大拖呂舢板戰艦相依爲壘賊目僞指揮鄭添得僞木八將軍羅友元等復領賊七八千人

進踞葛店地距省城九十里臣與李續賓會議於五里墩中路洪山東路選派六營精銳三千餘人以同知蔣益澧久戰知兵委管六營之事以一號令同知孫守信副之並令署武昌縣知縣林之華率武勇爲鄉導六月初一日起行初二日辰刻未及葛店十里而止蔣益澧集各營會議以前次五月十二十三兩日追賊百餘里士卒非不竭力而賊未盡殲者以迎勦於前而後無攔截也葛店地當總要內湖外江賊於街前築壘四座環以長濠深廣逾丈湖內賊船三十餘隻與陸賊相依非以計破之則堅壘不可必得

卽得壘而賊仍遁走久必復聚卽日已刻參將朱品
隆縣丞丁銳義率眾先循江岸低處潛渡白嶺山繞
出葛店街市之後蔣益禮自領一軍循江岸張左翼
以橫衝賊壘訓導鄒漢章知縣唐協和以二營當其
前又各分一哨先循湖右踏淺燒賊舟賊見我兵之
少分三路迎拒左營副左營訓營奮力直攻賊眾屢
御猶未奔潰副左營營哨官劉玉洪李有恆橫列陣
前首先陷陣哨官劉勝祥等首先攻撲賊壘二座賊
以大礮連環拒敵大旗手王有定鄒定祥等率三百
餘人伏地避之三伏三起搶入賊壘賊卽奔竄唐協

和率訓營邀截共殺賊四百餘名蔣益遭獨以湘左
營首先撲入左路賊壘二座殺賊四百餘名賊卽奔
竄其時朱品隆丁銳義已繞至賊後焚燒街外賊巢
署提臣楊載福親率水師登岸以截奔竄之路賊眾
數千人四路狂奔賊目持刀督之而不能禁也六營
夾擊其殲二千數百人藍翎守備陳仁蘭生擒僞將
軍羅文元並搜獲該逆僞印一顆僞指揮鄭添得被
我軍追殲於五里外之戚家山亦於逆身搜獲僞印
一顆其分哨以燒內湖賊船者亦奪得賊船九隻是
夜三更拔營乘勢窮追及於華容初四日及於樊口

矣旋據葛店附近居民繳呈首級千餘顆大礮十六尊擡槍四百餘件鳥槍五百六十件旗幟刀矛衣被各二千餘件因蔣益禮等連夜追剿不暇批解卽飭鄉民先行解營呈驗也梁子湖周四百餘里匯江武咸通興治六州縣之水內有九十九汊向爲盜賊之藪實省垣之關鍵樊口又其入江之總匯也樊口東岸卽武昌縣城外西山雷山蟠亘險峻賊卽於此扼要守險築壘設關賊船憑依陸壘得以出沒江湖又於城外築壘互相犄角夾護賊舟其糧食軍火均聚於此水師前次下攻樊口軍船中流轟擊以江水駛

急不能久駐時無陸師相助故賊得負嶠日固湖內
賊舟不能淨盡下游各賊仍得上駛初四日辰刻陸
勇追賊至此紫營西岸得勝洲提臣楊載福率水師
登岸與蔣益澧孫守信林之華等察看地勢會商夾
擊之策是日午刻陸路各營分五路齊進直逼賊壘
轟擊賊落水死者數十人蔣益澧令軍中梟水先渡
奪獲賊舟者重賞湘前營隊長守備銜千總鄧有才
首先奮勇梟水奪得舢板船一隻訓營守備陳仁蘭
躍登賊舟中礮墮水陣亡湘前營哨官王桐柏復登
左營哨官楊德武繼之於是各營爭先馮河鼓勇陸

師攻其後水師攻其前內港之賊棄船先潰焚船踏
壘殺斃溺斃者約二千餘人西山雷山賊旂四布與
距城之賊互爲聲援尙未敢馳下交戰而先渡樊口
各陸勇已與水師登岸攻縣城北門小北門各營官
帶領大旗奮勇數十名驀越山嶺賊眾驚潰乘勢掩
殺甚眾遂分攻縣西門小西門署知縣林之華亦率
武勇繞攻東門先後入城追奔逐北城郭一空其得
出小南門逃竄者不過餘賊數百人我軍追至南岡
七里界而還是役除焚燒外計奪獲大拖罟船三隻
快蟹船七隻舢板船二十八隻輜重船三十餘隻刳

船八十餘隻礮位一百餘尊葯彈各二萬餘觔旂傘
器械轎馬米糧之屬悉爲我有連日拔出被擄百姓
亦不下二千餘人沿途鄉民扶老攜幼歡呼迎犒如
獲再生初五日一面配帶礮船入梁子湖搜勦一
面出示招撫百姓入城此初二初四等日水陸諸軍
在葛店樊口及武昌縣城連獲大勝之實在情形也
水陸諸軍分合往來出賊不意莫不冒暑苦戰奮不
顧身仰賴 皇上天威每戰輒克而踞省之城外
援屢敗猶揚言欲待僞北賊韋昌輝之上拔也與李
續賓仍日夜環攻以期盡殺乃止斬百出力員弁勇

丁可否準

臣

擇尤先請優獎以示鼓勵其前後勇戰

陣亡之藍翎守備陳仁蘭可否照鄰目優卹藍翎千

總曹起龍可否照守備優卹藍翎把總胡立發陳日

勝黃雲浦可否均照千總優卹藍翎外委魏學法張

光連外委尹見興丁仙源崔得勝儘先外委歐洪培

記名外委楊玉春李大成可否照把總優卹以慰忠

魂出自

天恩其餘傷亡之員弁勇丁容

臣續查

彙案分別奏咨請卹仰祈

皇上聖鑒訓示

上諭胡林翼奏迎剿賊援弁攻勦省城賊匪迭次大勝一

摺

此次水陸各軍往來分合奮力環攻甚爲得手著

胡枝翼迅飭諸軍乘此聲威進圖克復省城出力員弁
兵勇準其擇尤先請鼓勵力戰陣亡之守備陳仁蘭著
從優照都司例議卹千總曹起龍著照守備例議卹把
總胡立發陳日勝黃雲浦均著照千總例議卹外委魏
學法張光連尹見興丁仙源崔得勝歐洪培記名外委
楊玉春李大成均著照把總例議卹該部知道欽此 六
月二十六日同督部奉軍機字寄

援賊大至謹陳攻剿防禦情形疏 七月十七日

竊臣

於五月六月兩次勦辦援賊追奔二百餘里業
經迭次奏報在案六月十二日城內逆賊以官軍按

日進攻復乘夜於雙鳳山修築礮壘李續賓自率右營由田隴中路進攻派副右營由沙子嶺進中營由東嶽廟進臣派正訓營副前安營由賽湖繞道以策應之各勇登山槍礮環攻立將礮壘平毀礮石概行運歸賊此壘屢修屢毀是日斃賊五百餘名賊氣大創不敢復於此作壘矣其攻破樊口之行軍三千人於十二日移師渡江進攻黃州郡縣臣復抽調副仁營以益之水師六入搜梁子湖者凡八日而始出江方造雲梯掘地道合北岸馬步兵力以取黃州環攻已十日矣而各路士民探報均稱翼賊石達開自金

陵糾眾上竄僞衛天侯會逆僞春官丞相張逆亦自
湖口並力上竄詐稱五萬已到者不過三萬人臣搜
得石逆僞文書又溯江西臨江府城之賊從義甯通
城來擾上游又稱船礮已少現於安慶彭澤等處造
船運礮以資水賊之力蓋賊之力爭江漢其蓄謀固
已狡矣臣思三千餘人觸暑遠征幸而獲勝此次賊
數較多必非三千人所能獨禦且臣之後路歧途甚
多其由義甯至蒲咸者一路由興國至通崇者一路
由大冶出金牛者一路均可擾臣營之上由武昌縣
出華容葛店者一路其分擾於土橋豹子澗青山者

又分爲數路均可擾省城之下禦於此必遺於彼當
將行軍撤回大營同知蔣益澧孫守信等遂先期知
會北岸兵勇團練先行撤隊六月二十七日行軍亦
回大營而援賊已分一萬餘人先走金牛上竄山坡
七月初四日派蔣益澧率湘左營朱品隆率湘前營
何紹彩率仁營何慶元率副仁營張寅恭率恭營周
占魁率鳳營唐飛舞率虎營出師紙坊以禦之而仍
統於蔣益澧以一號令賊之行抵金牛者覘我有備
遂折而併力於武昌縣之葛店以趨洪山之後七月
初十日蔣益澧等仍轉紮魯家巷實爲洪山後路之

總要安營市畢該匪分股試探乍前乍卻爲誘戰之計我軍寂若不聞十一日該逆分十三股排列而至每股約一二千人旂幟林立我軍列陣以待該逆之中路數股直前試撲我軍仍屹立不動其由馬鞍山歸併之大股正仁營副仁營虎營禦之其由俞家山歸併之大股湘前營鳳營禦之其由驛路併成一股則湘左營恭營禦之自己至申我軍乃發號進擊槍礮齊施刀矛繼進殺賊四百餘名奪獲各色大旂二百餘面馬二十餘匹風雨驟至收隊回營其仁營都司何紹彩前營參將朱品隆之分路追勦者頗遠賊

以另股從後繞之該員等行陣嚴整左右衝突力戰
最久陣亡勇丁三十餘人而所殺賊匪又以二百餘
計整旅回營竟不可敗及至各營聞警再出而賊亦
竟不能逼十二日水師游擊鮑超都司周清元都司
喻吉三由沙口下駛乘勢將樊口新造浮橋燒斷又
登岸毀其陸賊之壘以大股盡數上犯守壘之賊不
多也喻吉山又獨於黃州城下燒賊船數隻旋即回
泊沙口魯家巷兵力尙單臣又派副左寶營七百人
以益之十三日賊以數千人撲營各營堅忍以持之
轟斃四百餘名賊即駭走追及里許默察旁路數里

之外尙有大股隱伏於城隴之旁遂不敢乘勝追剿
以甘如計十五日賊數千人撲營官軍嚴陣以礮轟
擊斃賊三百餘名追賊約二里此千一十二十五等
日水陸分剿援賊之實在情形也臣查石逆自上年
由鄂入江西所過殘破自攻陷吉安以後潛由江西
九江安徽祁門至於金陵方鳴張於下游復回竄於
武漢氣燄頗熾詭譎多端必應嚴密堅定慎以持之
固不致因賊多而怯尤不可因小勝而驕其來方銳
堅持數日挫其兇鋒彼竭我盈乃可乘勢痛剿也臣
之中路李續賓之東路合計勇丁一萬餘人刻下抽

調四千七百人於魯家巷迎勦

臣

營只三千人洪山

亦不過四千餘人城中因獸斷不可稍有疏縱致開

異口之禍根外援已至當必出戰至

臣

營之後面可

通金口紙坊者約有三路

臣

先期已掘長濠濠內修

築堅壘每壘可容二百人仿古人礮堡之式以資防

禦而免返顧之虞諒不致四路侵軼自爲驚擾而臣

亦得以專勦城中之賊並分兵以勦援賊此先期布

置之情形也督

臣

官文會同將軍都興阿飭令副都

統銜翼長巴揚阿抽撥馬隊百一十名十三日渡江

十四日移駐洪山以助異口追勦敗賊之力當亦賊

所深畏也其陸師平毀雙鳳山賊壘及進攻黃州府
城並魯家巷接仗衝鋒力戰陣亡之千總楊太利余
永勝魯連升請照守備例把總李南廷汪友朋請照
千總例外委謝升祿傅正榮藍翎六品何連勝請照
把總例外水師攻燬樊口賊橋陣亡之藍翎把總成景
桂請照千總例外委朱洪甫請照把總例 賜卹
出自 天恩所有籌勦援賊並防禦接仗情形謹
會同督臣官文提臣楊載福恭摺由驛六百里馳
奏

謹按疏內請卹各員於七月二十九日接奉

旨準

再據同知銜會國華稟稱六月十七日行抵江西新昌縣迭次大勝十八日克復新昌縣城卽時移兵進攻瑞州府城距省不過百餘里江西餉項支絀稟請續撥軍餉等情臣查晉餉十萬兩除北岸督臣官文咨留二萬兩餘八萬兩均專濟李續賓及會國華各營李續賓不足五月之餉會國華亦僅足六月初旬之餉日下江西支絀萬分臣另籌他款由湖南轉運協濟謹附片以聞

上諭胡林翼奏援賊大至現籌堵禦一摺已降旨將陣亡

員弁議卹矣武漢賊勢久蹙因官兵不能實力進攻致
下游賊黨得以徐圖援應武昌南路本無布置黃州之
兵復撤則東路賊匪亦將源源而至惟城中之賊旣已
窮蹙自應迅速進攻尅日收復則外來賊眾絕望自易
勦滅著官文胡林翼悉心籌畫併力攻剿毋得再涉延
玩前因江北軍營帶兵乏人諭令官文酌調孔廣順前
赴揚州茲據奏稱該員現紮沙口其地爲外江內湖銷
鑰旣關緊要著準其暫緩前往倘接替有人仍令馳赴
揚州聽候德興柯調遣至湖北援賊號稱數萬若非裹
脅無業游民安得如此眾多朕聞皖楚曾經被擾之區

牧令或潛匿鄉村爲苟安之計巨室則遷徙一空城郭小民貿易傭趁者無計謀生遂致被賊裹脅是以賊黨愈聚愈多兵勇不敷抵禦實爲今日受病之源若不急圖變計正本清源將誅不勝誅伊於胡底前據文慶等奏請實行團練業經寄諭各督撫各按地方情形酌辦官文胡林翼職任封圻責無旁貸著於督師進剿外畱心選擇賢能大員分投督辦如黃州崇通等處皆爲賊匪竄擾出沒無常苟能慎選循良星羅碁布招集流亡實力團練在小民有所依歸不致流而爲匪則賊援日少賊勢日孤未始非軍務之轉圜也該督撫毋得視爲

迂緩致誤事機將此由六百里加緊各諭令知之七月二十九日同督部奉軍機字寄

附陳左郎中韓知府才畧疏

再臣與兵部郎中左宗棠同受業於前御史賀熙齡之門深知其才學過人於兵政機宜山川險要尤所究心臣曾薦於前兩江總督臣陶澍前雲貴總督臣林則徐均稱爲奇才咸豐二年賊犯長沙臣薦於前撫臣張亮基招入幕府專襄兵事張亮基調任山東巡撫該員仍入山居四年南撫臣駱秉章侍郎臣曾國藩招入幕中辦事其才力猶能兼及江西湖北之

軍而代_臣等爲謀業經御史宗稷辰奏明在案該員秉性忠良才堪濟變敦尚氣節剛烈而近於矯激而折人過不少寬假人多以此尤之故亦不願居官任職_臣思聖明之世正氣常伸該員畏權世網殊爲過慮但久在兩湖辦事所用多係楚人自是廉頗思用趙人之意不樂吏職可從其志義在討賊諒無可辭_臣既確知其才謹據實臚陳聖聽以儲荆

鄂將材之選再_臣在貴州道府任內訪求知兵之員殊不多得惟查委員韓超直隸副榜舉人深明兵畧剛正不撓_臣前所帶黎平團勇皆韓超訓練之力其

才非臣所及近年黔疆不靖聞該員已擢知府崎嶇
於台拱清江之閒年餘無餉勸諭良苗聊供食米部
曲尙未盡散該員年已六十矣勇敢嘗爲軍鋒近年
文報梗塞恐其終必飢困坐失良將倘蒙 敕下
雲貴督撫設法濟餉假以事權可爲 國家兵事得
力之員臣爲將兵需才起見謹附片 奏陳

胡文忠公遺集卷十終